

RIJEČ REDAKCIJE

Osnovan prije šest godina, Institut za proučavanje istorije radničkog pokreta razvio se u naučno-stručni kolektiv koji je sada u mogućnosti da pred našu javnost izade sa publikacijom u kojoj će, u početku povremeno, a zatim periodično objavljivati naučne i stručne radove svojih saradnika. Razumije se da će sadržaj, profil i nivo publikacije biti određeni prije svega naučno-istraživačkim programom Instituta, tačnije njegovom realizacijom. Otuda nema potrebe da se ovom prilikom iscrpnije govori o programu i zadacima »Priloga«, kao što je to uobičajeno kada se pokreću ovakve publikacije. Pa ipak nam se čini korisnim da istaknemo nekoliko momenata.

Prvo, naučno-istraživački program Instituta za narednih šest do sedam godina pruža osnovne elemente koji će najviše uticati na utvrđivanje tematskog okvira »Priloga«. Ovaj program obuhvata kapitalna pitanja istorije nastanka i razvitka radničkog pokreta u Bosni i Hercegovini, narodnooslobodilačkog rata i revolucije, kao i perioda izgradnje socijalističkog društva. Međutim, već sada možemo konstatovati da se rad na njegovom ispunjavanju ne odvija ravnomjerno, prije svega usljed činjenice što među istoričarima ne vlada jednak interes za pojedine periode. Otuda će ova okolnost nužno dolaziti do izražaja i u »Prilozima« i tako poslužiti kao ilustrativan podatak o razvoju same historiografije socijalizma u Bosni i Hercegovini.

Drugo, iako je primarni zadatak Instituta da proučava istorijski razvoj radničkog pokreta u Bosni i Hercegovini od njegovih početaka do našeg vremena, tj. do samog perioda izgradnje socijalističkog društva, »Prilozi« će objavljivati radove koji ne stoje u direktnoj vezi sa naučno-istraživačkim programom Instituta ukoliko se odnose na značajne političke, ekonomske, kulturne, ukratko društvene pojave i događaje pomenutog razdoblja, ukoliko su zasnovani na istorijskim izvorima i po svojoj obradi predstavljaju doprinos istorijskoj nauci.

Treće, ima dosta događaja koji se u najnovijoj prošlosti nisu odigrali na teritoriji Bosne i Hercegovine, već na tlu Hrvatske, Srbije, Crne Gore, kao i na tlu drugih jugoslovenskih zemalja, a koji su imali veći ili manji značaj za razvoj socijalističkog pokreta i socijalizma u Bosni i Hercegovini, koji su, uopšte uzevši, imali

dublji odjek u novijoj istoriji Bosne i Hercegovine. Nema potrebe isticati da će svim takvim radovima biti otvorene stranice »Priloga«.

Na kraju, veliki nedostatak istorijskih izvora prvog reda o djelatnosti KPJ u Bosni i Hercegovini u periodu njene ilegalnosti može se donekle ublažiti tekstovima memoarskog karaktera. S tim u vezi, »Prilozi« otvaraju mogućnost partijskim aktivistima iz ilegalnog perioda, kao i iz perioda narodnooslobodilačkog rata i revolucije, da svojom saradnjom u obliku sjećanja, kao i dokumentacijom, doprinesu potpunijem osvjetljavanju događaja u kojima su neposredno učestvovali.

Čineći ove napomene, izražavamo našu želju da »Prilozi« stalno proširuju krug svojih saradnika, kako iz Instituta za proučavanje istorije radničkog pokreta, tako i uopšte iz reda istoričara kao i drugih javnih radnika koji imaju mogućnosti i afiniteta za rad u ovom domenu istorijske nauke i tako budu istovremeno podsticaj i doprinos razvitku i napretku istoriografije socijalizma u našoj zemlji.